

§. 6. *Mercenarius* negat majorem, & ad probationem dicit non quidem unum specie, sed tamen unum numero addere aliquid supra Ens. Sed contra: id quod addit, cum sit aliquid reale, erit ipsum quoque Ens, E. addet aliquid supra seipsum. Si verò dicat non loqui se de omni Ente, quod etiam modos includat, urgeo: id supra quod unitas numerica aliquid addit est Ens. Si igitur est unum numero præcisum ab addito, nihil addit unitas numerica; sin minus dabitur quoddam Ens reale, quod non sit singulare de quo infra. Taceo quod *Mercenarius* more Scotistico respondit, cum favent Thomæ.

§. 7. *Ramoneda* respondet: Unum & Ens formaliter differre, quamvis materialiter sint idem. Per Tò formaliter intelligit differre ratione. E. etiam principia unius numero & Entis ratione differunt. *Soncinas* ait *Aristot. IV. Met. 2.* unde hoc argumentum sumunt, non loqui de unitate numerali, sed transcendentali. Verum & illa est Transcendens, & non datur unitas realis speciei præter numeralem. Posset quoque aliquis pro omnibus sententiis adversis ex eò fundamento, quo à nobis differunt respondere, fieri unum numero per suam Entitatem, sed non totam. Verum obstat, quod altera quoque pars intrinsecè est una numero, & sequeretur si principia interna unius & Entis differunt ut totum & pars, unum & Ens quoque ut totum & partem differre, imò Ens aliquid addere supra unum. Atque hæc de hoc argumento fasius ut melius videatur quæ quisque effugia quærat.

§. 7. 2. Quæ sunt principia Entis in universali universalialia, ea sunt ejus principia in singulari singularialia. Sed tota Entitas est principium Entis universale in universali. E. Major probatur probabiliter ab analogia 2. quia principia universalialia nullo alio differunt à singulari, nisi quòd à multis singularibus similibus abstrahuntur. Est hoc argumentum *Stahly.* 3. *Durandus*: universale & singulare non differunt realiter, E. habent eadem principia. E. Entitas tota, quæ est principium universalitatis erit singularitatis.

§. 8. 4. Datur v.g. in Socrate natura intrinsecè ad ipsum determinata, quod concedit *Soncinas*, extra intellectum, & si negaret, daretur contra *Thomistas* universale completum in rebus. Imò